

Jangan lupa tanggungjawab sosial

Oleh **HAMDAN TAWADI**
utusanjohor@utusan.com.my

BATU PAHAT 3 Nov. - Pemangku Raja Johor, Tunku Ismail Sultan Ibrahim mengingatkan para graduan tidak membiarkan diri terbelenggu dalam kesibukan membina dunia kerjaya sehingga melupakan tanggungjawab sosial kepada masyarakat dan negara.

Dalam masa sama, baginda menyeru golongan itu melibatkan diri dalam aktiviti kesukarelawan sama ada melalui pertubuhan-pertubuhan atau badan-badan profesional yang menyalurkan sumbangan untuk membantu kemakmuran masyarakat, ke-selesaian persekitaran dan keamanan sejagat.

“Dalam kesibukan mengejar dunia kerjaya yang kukuh, sepatutnya kita juga tidak lupa menyalurkan sumbangan tenaga dan



kepakaran dengan melakukan kerja-kerja sukarela.

“Jangan biarkan diri terbelenggu di bawah tempurung kerjaya rasmi semata-mata sehingga terputus daripada jaringan tanggungjawab sosial kepada masyarakat dan negara,” katanya dalam Majlis Konvokesyen Ke-12 Universiti Tun Hussein Onn Malaysia (UTHM), di sini hari ini.

Sebanyak 2,775 graduan telah dan bakal menerima diploma dan ijazah masing-masing dalam majlis konvokesyen selama dua hari itu bermula hari ini.

Dalam majlis sama, Tunku Ismail turut berkenan menyampaikan anugerah Profesor Emiritus kepada Prof. Ir. Mohammad Zainal Md. Yusof selain menyaksikan memorandum perjanjian (MoA) antara UTHM dan Taman Negara Endau-Rompin ditandatangani membabitkan kerjasama

penyelidikan berhubung khazanah flora dan fauna.

MoA itu ditandatangani Naib Canselor UTHM, Prof. Datuk Dr. Mohd. Noh Dalimin dan Setiausaha Kerajaan Negeri, Datuk Obet Tawil.

Tunku Ismail dalam titah baginda berharap, graduan menjadi peneraju kepada pembangunan intelek generasi muda hari ini dan mereka perlu menjadi contoh dalam usaha menerapkan budaya ilmu dalam masyarakat.

Titah baginda, graduan juga perlu menjelajah dunia ilmu melangkaui apa yang terdapat dalam buku-buku kuliah di kampus sebaliknya memperluaskan budaya membaca merangkumi pelbagai bidang supaya menjadi generasi muda berpengetahuan luas dan matang.

Dalam pada itu, baginda turut mengingatkan para graduan supaya tidak melupakan jasa dan pengorbanan ibu bapa yang menjadi tonggak kejayaan mereka.



TUNKU Ismail Sultan Ibrahim menyampaikan Anugerah Profesor Emiritus kepada Ir. Mohammad Zainal Md. Yusof pada Majlis Konvokesyen Ke-12 UTHM di Batu Pahat, Johor, semalam.